

四庫全書

集部

欽定四庫全書

祠部集卷二十

宋 強至 撰

狀

代上張刑部狀

顯承召節榮解利權俛惟囂冗之縱素出獎題之目遽
違大庇曷諭丹悰藐如嬰兒驟奪慈母最若疲馬止思
故軒溯恩館以增勞進公函而差緩伏惟盛寒貫序冲履
飡和恭以某官器識闔通材猷高亮挺純誠而結主懋

鉅業以熙朝彙持使節之嚴出領計臺之劇邦須仰給
歲課頻優旋被詔音進圖心畫佐財闡之經度聊藉全
才叅政府之訂謨行叨顯命

代上審官密學狀

伏念某學古不優語能至薄嘗備屬官之列過蒙國士
之知一出品題遂階榮進亞守麾于淮上曾靡定居瞻
恩館于日邊畧諧拜伏奔命勞止貢書缺然伏惟順履
新陽翕膺景福恭以某官鍾氣間傑為邦老成蚤結聖

神之知益加體貌之重飛緜禁城久居侍從之聯班詔
邊藩累布中和之治疏恩黼座進直鴻樞審覆官能暫
繫于定鑑敷宣王化行秉于大鈞

代上運使度支狀

近承崇飾出接屬封俛惟陋藩最處要壤或官書之弗
整與民瘼之未蠲宜舉上臺之威以警他邦之闕尚繫
寬假不汝咎疵去德未遙佩恩良極仰惟純履舉集休
祺恭以某官才為吏師名重物論行甄風績驟被褒華

代上許待制狀

近者伏值某官奏輸將之大計入覲京師還留止于屬
封殆彌旬浹獲修版謁屢叩坐隅特忘位貌之殊俾親
燕語之重伏惟新陽貫序粹履飡和恭以某官才為世
生道先民覺宸篇彬郁方躋潤色之班國計羨盈行被
褒嘉之渥

上趙屯田狀

鄉列冗曹日叨巨鹿洎赴中銓之集方聞嚴旆之來雖

甚傾德誼之高不逮事堦墀之未旋擎舟而東下獲歛
板以前趨伏蒙削去常儀過存優遇兩紆騶從特顧旅
居自違遠于門牆鎮淹徊于道路瞻風惟日進記不時
恭以通判屯田行潔文醇才周業鉅關決要邦之治聊
以康民延登祕館之華乃為宜職

上樂職方狀

邇為賤掾方托仁侯曾不終朝遽然滿秩伏蒙忘其位
貌之隔視若子弟之親迨赴集于中秋復寓家于盛府

惠周幼父日賜撫存旋補邑以南還獲趨隅而下拜許
陪宴豆之未申貺公庖之珍越去恩麻洊彌月所淹徊
道路濶畧牋函伏惟靜治善藩舉綏秦宇恭以知郡職
方忠諒許國文章世家試劇要邦暫班于寬詔垂光近
署行服于華章

上蔣侍郎狀

適貢蕪音仰塵棊几方省瀆尊之咎遽蒙賜教之酬恩
獎過優公言加重拜而伏讀藏以為榮昔魯經尊仲尼

之褒有踰贈袞楚諺珍季布之諾不啻得金此越舊聞
尤深厚幸茲蓋伏遇致政侍郎主盟吾道惇勸士倫弗
遺簪履之微特屈王公之重親占勤誨俯及冗員永矢
糜軀仰酬知己

又

最爾微生缺然善狀蚤繇寒士之目嘗出大賢之門旋
試吏于淮州復調官于京轍一違台坐五見歲陰恩紀
敢忘第及肌膚之鏤公函不講懼于爵德之尊伏惟順

履蕭辰翕膺茨福恭以致政侍郎才謨深亮識宇闔通
珍策熙朝已底山河之固安車還第自遺圭組之榮為
物論之稱賢矧上心之圖舊就諮大政當叩於元龜覲
保粹襟庶全於永祿

代上知府章學士狀

竊伏盛德於茲累年緣習簿書之勞絕攀臺閣之軌俛
惟敝邑獲爾善邦如隣洪河日所蒙潤不遠數舍缺然
貢音伏惟溽暑貫辰粹襟迪吉恭以某官直清不倚莊

重自居蚤光書殿之游克踵相門之烈尚稽顯任屈有
寬條然才如弱翁寧久外補而上念賈傳行當召還倍
綏燕興前對休寵

代上元屯田狀

近遇齋舫俯經敝邑獲風期之觀止出天幸之使然歎
暑尚留燕居增裕恭以通判太博量函夷雅氣迪中和
掌故曲臺深明典籍之奧贊條方國佇洽海圻之安尚
阻趨承倍綏寢味

代上仙尉楊祕校狀

瀕江之別累月于茲待次彌年任懶成性坐曠尺書之
奉第勞寸臆之傾辱教甚勤寄顏無所忝以仙尉祕校
天資夷爽士檢淳修方美職之勤行被褒書之薦達尚
遙瞻挹倍衛燕興

代上北京文相公狀

伏念發蹤巨冶實台庇之焉依出守孤城已歲陰之載
易比終吏課嘗進公函違遠門牆之趨缺疎竿牘之獻

並紆梗概仰瀆高明竊料郵程之弗稽當歷鈴吏以茲
久遠驅車于道路方稅鞅于京師區區塵容袞袞人事
別都在望翹館非遐惕就謁以無從第銜恩而有素伏
惟坐班寬詔參萃繁禧恭以某官簡厚凝姿宣和迪德
抱精忠而致主懋顯績以光朝兩冠宰衡首謀王體濶
儀墜典率圖講于明廷偉烈豐功復蕩平于外閭既殫
能事弗有元勳懇列讓封樂還幾政旋開尊府出尹畱
京五月之治告成適煩君重一相之尊居外尚鬱民瞻

佇歸宅于上台以永康于四海

上越州知府待制狀

伏審就膺細札移殿巨邦已即便辰榮開尊府伏惟慶
慰恭以某官量函簡厚識貫幾深自結主知歷紆賢業
總東南之大計蚤懋膚功暢左右之偉謀尚稽寵拜鄉
露章于黼辰獲均佚于蕪城風績愈凝歲課連最思匡
微俗旋易名藩雖買臣懷章歸驚于守邸而望之為郡
雅在于本朝行對詔函進調台鼎俛惟寒士之目素出

大賢之門恩紀未酬愚衷曷諭

上興國知軍陳郎中狀

頃從初仕獲庇仁侯鄙鈍自持羈單孰援遽收寒士之
目俾出大賢之門旋去嚴麾挈來小邑三歲僻壤僅絕
貢書之借一心恩闕未知論報之地伏惟坐班寬詔誕
擁繁禧恭以某官為邦老成作吏師表觀風軍壘尚鬱
于賢謨熙績王朝行光于帝簡

代上蔡三司狀

某實今之愚自少則任席嚴父之餘寵寢叨臺郎誤宗
工之重知彌愧國士曾乏寸長之錄屢蒙清譽之加顧
舟楫之攸同號簿書之兼冗度不能而雖止荷所賜以
惟均一來河濱久去門下左右之供于職不知歲月之
遷起居之奉公函都失寒暄之問仰賴恕情而曲貸少
寬廢禮之嚴誅伏惟發抒偉謀臨總大計獎竇倖門之
出已閉塞以無餘利源竇路之藏復開通而有裕民財
內贍于國兵食外豐于邊膚功邁成能事云畢行聽都

俞之命告厥廷中坐開康濟之懷擴之天下爾時屏陋
訖望埏鎔

代青州相公先狀

伏審入覲明庭出臨巨屏油幢周匝益知丞相之尊行
路歡迎將慰邦人之望俛惟冗列方冒劇司督運淮邊
適當于使道趨風節下即拜于清塵日企台儀曷勝愚
悃恭惟某官忠誼結主文章致身蚤慮康濟之才少見
太平之效雖廟堂之上皆利澤之素行而藩翰之間欲

化風之親被樂班寬詔游撫遐氓坐席未溫行聞于趨
召元台之舊亟復于陞庸俛惟疏外之蹤訖託埏鎔之
造

李密學先狀

伏審將辭魏闕已整齋臚饒鼓沸川允極行暉之盛壺
漿溢路前知輿望之濃拜德有期實天與幸恭以某官
氣鍾間傑道具大醇由妙年而取甲科不累日而都顯
位幅員億姓久濡霖雨之沾藩屏一方聊藉仁風之扇

餘畱瞻伏併叙傾翹

代邵興宗北京相公先狀

受君言于國勞使聘于郊仰企台光甫入別都之境深
繇天幸將瞻上衮之威竦并兼懷文陳非諭

瀛州澶州知州先狀

遠迓使車前經帥閫塵容載被行干典謁之司德範所
瞻庶釋傾風之蘊其為并幸美盡敷論

題轉先狀

將命以行勞賓于外獲道使臺之便即登客廡之嚴餘
在趨承併紆翹嚮

代許州賈侍中先狀

得收小邦請塗褰服台躔在望魂已媿于熒煌賓袂如
歸迹自忘于踈冗矧預薦紳之列嘗居巨冶之間寢竊
官榮率緣恩素茲趨風之有地信獲幸以由天俟稅征
車即干典謁屬歲陰之凝沍仰德履之綏將文武兼資已
極宗臣之貴邦家所賴行還上宰之嚴瞻覲有涯欣榮

借極

上龍圖狀

恭以某官瑚璉茂器河嶽上靈以忠誼結主知以文章
重時論翺翔華序暉映清時邇臨邊閩之雄洊總漕臺
之劇進榮班于延閣陞茂績于本朝金穀要司暫繫于
心計鈞衡顯命佇奉于詔音

荆南張龍圖狀

自違治屏寢易歲時適便道以趨官第望風而懷德伏

唯靜布寬詔翬臻純禧恭以某官識蹈大方氣陶至粹
雍容近綴暉映本朝內閣陞華厥適臣侍從之事外臺
分寄詠太守中和之詩然而先一州乃大用之階為三
公由此塗而出行聞爰立以副具瞻

知府龍圖狀

恭以某官莊重自居直清不倚言經邦國之體學際天
人之交出對休辰進更顯仕旋陞延閣密侍邃疏京邑
四方之表儀方騰于尹政宰廷百辟之師師當被于朝

魚咫尺聰聞旦夕冊拜甫臨首祚誕擁繁禧某適縻漕局之煩莫逮壽杯之奉其為瞻企曷可名言

上知郡都官狀

右某言比者知郡都官解麾南服奏課中宸藐如嬰兒驟奪慈母茶若是馬止思故軒仰跂恩暉第零感涕惟齋舫之遐遡固德宇之中安恭以知郡都官才貫幾深器函剛實政不火烈民自畏之心猶衡平事罔欺者行光循吏之目親受聖王之知匪朝甄躋協時傾屬某短

才初仕嘗備于使令裕度兼容靡尤于鈍拙更繫餘末
之庇曲保孤單之蹤不由他門以畢大造伏望上為邦
社精調寢興

上貴池仙尉狀

自阻風期倏彌歲所奔馳掾局常若少閒將迓使車曾
無虛月因曠起居之間仰諮燕飭之安豈謂注存首貽
音諭不忘雅素第切中藏暑氣方炎晤言正邈倍祈愛
重少慰瞻翹

代上何舍人狀

備位冗官副車下郡冠蓋旁午鎮事于將迎案牒沈迷
坐成于勞辱望長安之日第悚遐心傾西州之風阻瞻
粹矩伏惟雍容禁列熙暢沖襟恭以某官亮直蹈彛中
和迪哲文經邦國學際天淵載筆記言方書萬世之法
秉鈞調化猶鬱四海之瞻行被詔音驟光冊拜

參政趙侍郎狀

恭惟參政侍郎為國雋老受天元精自結主知備紆賢

業坐陪幾政會月月之休明仰對慶辰贊乾坤之茂育
翕膺時祉增煥台躔某職總使臺跡疏賓廡永言瞻頌
曷盡敷論

福州密學士郎狀

就奉明綬擢司外計顧短材之非稱賴巨庇之焉依已
即便塗行登尊府恭以某官夙鐘間氣親邁熙辰秉忠
諒之一心出誠明之正性備舒賢業自結主知踐碧落
之華班兼鴻樞之秘直差緩登庸之冊即分鎮撫之符

通恭梓之巨邦布坐崇之美化江山有助不廢于清吟
圭衮儻來靡嬰于素志風猷增邵時論確高然而先一
州乃大用之階為三公繇此塗而出行膺迅召入踐嚴
塗餘遲瞻承併紆翹緒

范資政狀

瑣焉近器效此冗官念案牒之沈迷坐縻俗狀企旌麾
之嚴密阻拜台儀伏惟鎮撫巨邦有宣寬詔神明所右
福祚載蕃恭以某官社稷宗臣山河間氣道誼行已忠

諒致君傑立當朝究恣能事出綏邊畧進貳宰廷收已
試之豐功厭居台路分唯良之寵寄連換守藩行奉溫
書亟躋上袞

同事邵學士狀

繆叨恩詔與領計符朝廷弗棄非才駑蹇以為可使席
衣冠之餘緒寢竊時榮眦金穀之要司惜無素術俯伏
承命兢慙失圖賴夫聯事之賢茲有乞靈之地風期伊
邇天幸居多恭以某官學造聖微名高士論籠財外計

似非職業之宜載筆嚴塗行代訓辭之出

盧楊二侍講狀

自去德誼漫踰歲時鎮鞅簿書之勞絕竦竿牘之間仰
惟福履俯順生經恭以某官道具粹淳學際元本發先
民述作之奧中當世修明之科暉映端朝雍容近綴屬
聖王崇儒之際得君子逢辰之光翔步赤墀備天臨之
顧問解經內閣廣上德之聰明行副眷懷驟膺陞擢

孫內翰狀

近被宸綸出從吏局馳心剋館之下回首長安之遙遐
企恩暉第盈感抱維侍從之豐暇固神明之頓還恭以
某官道具粹醇德函剛實早居仙籍之高選茲冠禁林
之貴游體詔意而裁訓詞方見真儒之效柄台衡而圖
政教行畢大臣之能曾是冗微最叨知獎諒其愚介謂
可甄題事雖迫于他端恩已遇于衆遇恭以某官夙鍾
間氣親邁熙朝論不詭于聖人言有補于當世蚤揚華
質登踐禁局密詔深謀或內參于坐論高文大冊皆進

候以立成潤色宸猷發揮賢業矧北扉之上笏即黃閣
之便塗視草玉堂靡吝于久次調元金鼎行副于具瞻

張祠部狀

向陪朝謁阻遠賢規仍引紱以竊榮將還鄉而待次優
游故治條爾彌旬復為人事之勞美緩公函之奉仰惟
純履誕擁繁禧恭以某官莊重自居直清不倚逢辰熙
穆筮仕光亨尚淹冊府之游聊寄漕臺之柄下車視事
列郡傾威運心計于無垠方繫幹濟被恩章于不次行

步顯嚴

海州通判盛寺丞狀

逖違英範增鬱塵襟徒然燕語之傾缺爾牋滕之致豈
圖情照首占音書意在遠而彌親禮由謙而益厚仰銜
勤抑第切銘藏歎溥向闌標儀猶邈勉綏寢餗前荷寵
榮

錢塘鄭寺丞狀

之官江裔去德歲餘幸治境之相望暢音函之不講日

棲濃蔭坐企高風韶煦貫辰燕興迪吉恭以某官材猷
膚敏方格淳修較藝禁局賜科詞級試才劇邑休有美
聲翔步嚴塗佇還舊物益綏寢味少副瞻祈

施發運狀

某備位守藩託身使節日有詔條之奉缺然牋牒之修
仰料燕興舉臻禧祉恭以某官民靈先覺王佐偉才早
陞天閣之華兼領諫垣之祕提衡外計茲鬱于具瞻秉
軸上台行聞于爰立伏望為國自壽協時所頌

發運施待制狀

近者伏遇某官假塗屬部奏計中都某適貳小邦獲瞻
上笏旋齋舫之遐遡固德宇之中安恭以某官才貫幾
深量函夷雅由妙年而取上第不累日而居要官利柄
浩穰暫倚濟時之畧宸篇彬郁造繫潤色之才方入對
于王休佇驟光於冊拜伏望為國自重以時考祥

施龍圖狀

西州一命支郡下僚託使施之末魔沾恩疇日列公函

之兼幅叙感後時伏惟鎮撫巨邦綏寧泰宇恭以某官
知謀光大術業崇高道誼致君忠諒行已脩紆賢蘊歷
踐班榮蚤為聰哲之知出總東南之漕風猷益茂歲課
頻優掌官鑰于留都未溫坐席改守符于邊閫聊倚長
城行被召還驟光冊拜

又

自去恩麻游更月所委質草茅之賤嘗備下僚馳心旌
榮之嚴第增勞想向抗塵于臺牒缺進記于鈴齋伏惟

班詔多餘擁休彌裕恭以某官中和迪哲洵直懋功由
高文而掇異科不累日而都顯位名重時論才為主知
早年立朝有臺閣之風米頻歲成績董江淮之轉輸尚
淹薇冊之榮聊屈寬條之寄行膺柄用大副巖瞻

上二漕狀

某一竊科籍久康祿鍾走官路而非常悼親瑩之未卜
露章得請襄事言歸鄉里以恩意往來板輿以登頓勞
苦仍懷喬木之戀不覺還轅之遲在私欲而更安致王

程之淹引日虞按舉以詰稽違賴外臺軫惻之仁全末
路孤危之迹此蓋伏遇某官恩推再造量極兼容特寢
見行之文靡尤既往之舊使朱幡家守獲訖于恩榮皓
首偏親同終于孝養欲報知己敢忘捐軀

金華知縣國博狀

伏審解印還臺促裝首路驟違巨庇增鬱丹悰聞赤子
之攀轅第欽遺愛參諸公之供帳莫遂愚衷恭以某官
風業宏長襟致夷遠試才劇邑適善治之告成第課明

迂行茂恩之優及瞻祈戀結無諭下情

省副王郎中狀

恭以省副郎中盛德之後元精所生甘泉之課屢優茂
恩行及淮水之源方濬遠用奚涯順履天陽載蕃時福莫
遑為壽第劇傾風

代問候屯田狀

右某自紆守紱逖阻朋簪近繇愚息之行嘗致幽緘之
問伏惟布行寬治臨撫善邦鎮靜多餘神明永復恭以

某官稟氣間傑為時聞人父母一州不足充天下之望
旦夕中詔將以副上心之傾回翔顯近變理元化伏望
為國自壽以時考祥

代問候丁憂李端明侍郎狀

某自冒仕階嘗出門下奔馳吏役邈矣一涯契濶台光
倏焉累月第馳心于恩館曠聚感于書牋坐跂標儀鎮
勞悃臆仰惟孝履俯順禮經恭以某官名世鍾賢際天
蘊識以忠誼結明主以文章重當時輝映端明翱翔華

貫以至載筆法座代言禁廷上直文昌之垣榮蕪秘殿
之秩旋出觀于藩政俄入宰于銓衡品題庶官時所稱
允師帥百辟上方注懷遽邁親闡之悲差淹台衮之拜
然萬鍾及養足以慰夫生平細札奪情可金全于忠孝
永言瞻禱曷究指名

代問候許發運狀

竊玷茂恩獲監便郡使麾所屬官次焉依伏惟順履蕭
辰誕膺茨福恭以某官纓紱奕世文章冠時上知甚明

自結益固金穀登羨備紓富國之才朝廷寵嘉行付經
邦之任某適棲暉庇倍切傾祈久曠台光尤深戀結

代問候程密諫狀

被命中宸劾官南服門牆愈遠慮遺冗外之蹤賤牒不
時懼瀆高明之聽仰惟坐鎮俯順生經恭以某官亮節
在廷懿文表世早紓賢業自結主知陞諫署之華班兼
樞廷之秘直中外洵歷明哲維均父母一州猶鬱于清
議領袖百辟行副于具瞻俯惟下僚嘗備屬吏庶終塊

北之造以就生成之恩

吳司諫問候狀

右某伏念竊玷茂恩獲臨便郡逖仰諫垣之貴列嘗同鄉闈之昔遊日企標儀坐勞惊臆伏惟居得為之地有結主之資咫尺清光啟居純福恭以某官銜蘊經濟學該本元親逢聖期獨中賢選雄文珍策早奉對於大廷至論昌言茲弼違于當世匪日爰立協時具瞻

陳州相公問候狀

右某比者叨承明命獲假便麾去國匪遙盡出大鈞之
賜貢書差緩懼干上袞之威伏惟靜布寬條翕臻純祐
恭以某官體凝方重道著將明結真主之深知極大臣
之能事幅員億姓已躋富壽之區藩屏一方聊布中和
之治行膺宸照還秉台衡

司農張待制問候狀

右某近被詔書就移藩服方休道路之勤頓即有教條
之奉行阻叙暄涼仰諮寢味恭以某官夙鍾間氣親會

熙辰咫尺清光翱翔近禁宸篇彬郁方絜潤色之才農
府登盈行被懋庸之賞驟歸柄用少慰輿瞻伏望上為
邦家精調燕起

承旨內翰問候狀

右某伏念假守小邦瞻風上笏惟侍從之豐暇諒神明
之綏和恭以某官道具粹醇量函夷雅頃居仙籍之中
選茲冠禁林之貴游體詔意而裁訓詞方見真儒之效
柄台衡而圖政教行畢大臣之能

安撫資政問候狀

右某近奉音郵計塵台座仰惟福履誕擁休祺恭以某
官經世高才薦紳碩望厯更華要之選備極將明之才
天下之安暫休于廊廟方面之計屈布于藩條諒五月
之政成即三篇之冊拜伏望上為邦社精調燕興

李刑部問候狀

右某言竊念使麾所屬旅次焉依如隣洪河日所蒙潤
不遠數舍缺然寓音伏惟順履歆炎誕膺禧福恭以某

官德函剛實才貫幾深親會聖辰備處賢業登車攬轡
已澄序于官聯軌粟飛芻復羨盈于邦計行旌幹濟驟
陟近嚴

代問候提刑郎中狀

右某自遠麾符屢更弦晦仰惟純履倍集龐褫恭以某
官經世巨才措紳碩望進持國紀當宁器其詳平出按
刑章列城竦其風采行當秩滿佇聽詔還伏望上為邦
朝精調寢餼

候青州安撫大資狀

右某自違鈞庇日企台光伏惟鎮撫之餘福祥所萃恭
以某官際天蘊識名世標才宰樞廷之密謨專將闡之
外制悉殫碩畫訖致大寧以至屈領守麾榮兼使節將
天子惠綏之意慰安元元詠太守中和之章述宣晏晏
行奉星召亟還上台俯惟哀遲鎮託銘造

問候通判都官狀

學古不優汝官無狀備使令于庇下蒙顧遇于尊前居

常親承教誨之言不覺身在州縣之賤貳車言邁決日于茲惕孤宦之疇依企餘光而獨甚仰惟純履舉萃醜休恭以某官莊重粹溫剛明精敏闡掌郡事屈領簿書之繁鈎深聖微行司典籍之秘

代問候荆南知府狀

自遠鈴齋寢移圭籥惟淮壖囂冗之地有官簿沈迷之勞曠繼奉于音題以究陳于感愨伏惟布宣寬詔集受繁禧恭以某官業履蹈中和猷彪外聳動端朝之望雍

客內閣之華惟荆渚之雄藩據洞庭之勝壤厭居秘殿
之侍樂駕兩轡之游圭衮儻來靡嬰于素志江山有助
不廢于清吟諒五月之政成卽三篇之冊拜

祠部集卷二十

欽定四庫全書

祠部集卷二十一

宋 強至 撰

狀

代問候文相公狀

迎塵牋牒仰瀆鈞衡兩兩台星諒迴於鑒照巖巖尹石
彌極於企瞻伏惟坐論萬事之機翕受百祥之粹恭以
某官代天鉅業名世偉才冠羣后於中階總大猷於一
體稷高維已治安率土之濱羲軒吾君拱揖巖廊之上

某夙惟駑獯嘗荷挺鎔適居冗外之聯阻伏凝嚴之地
代問候運使郎中狀

貳職於藩宿官無狀比緣崇旆出按屬城道繇陋邦日
瞻高矩去德未幾馳戀彌深曠奉牋函仰咨寢餽恭以
某官盛德之後元精所生紓賢業於端朝踐郎曹之正
列尚淹柄任暫領漕權運心計於無垠適資幹濟取民
藏於既庶行底羨盈貯簡宸衷驟陞邦署

代問候發運大諫狀

向按屬城迫道途之勞止遐傾蔭宇惕歲牒之缺然伏
惟溥署貫辰粹襟迪吉恭以某官民靈先學王佐偉才
由妙年而取甲科不累日而都顯位以至躋天閣之密
侍兼諫垣之要班主知素明賢業彌劬差緩登庸之邦
屈持通漕之權然金穀羨盈已富王都之計而均衡密
勿行居台席之崇

代問候發運狀

寄身使節職守藩旗撫弱植之疇依企餘光而日甚向

沿臺牒曾靡定居仰奉郵音倏成慮禮伏惟坐籌大計
舉集繁禧恭以某官覺在民先行為世表早躋纓紱之
責自結纊旒之知寵寄茲隆聲光愈綽籠山海之貨方
洽羨盈充邦國之須適繫幹濟行疇茂績亟踐嚴途

代問候發運孫大監狀

解去山麾揭來上國尋嬰人事之冗間奉朝趨之常南
望使臺纒遠千里內省書札不修累年簡棄乃宜兢慙
何補伏惟坐籌大計參萃繁禧恭以某官名重薦紳才

兼數罷寢揚撫仕獨映榮班總山海之輸將尚煩劇任
瞻邦家之調度行錄茂功與言所符柄用非晚

代問侯許端公狀

近者伏遇某官告成歲課入覲天威因假道於屬封獲
趨承於嚴旆宿官無狀第引領以傾風貢問不時徒覲
顏而增懼伏惟時暄貫序純履滄和恭以某官業履蹈
中才猶彪外勤勞十稔總淮海之輸將瞻足大農經邦
家之支度已列霜臺之秘行登天閣之華翹企維深欣

愉曷罄

代問候南京杜相公壯

茲以謫材猥當煩使閱簡書而按治曾靡寧居奉牋牒
以問安已成曠禮伏惟水行貫序谷養餐和恭以某官
業履崇高智謀光大尊股肱之一體擬金石之純誠珍
策熙朝已底山河之靖安居就第遽遺圭袞之榮維衆
論之稱賢矧上心之圖舊就謔大政當叩於元龜善毓
粹襟庶全於永祿

代問候何舍人狀

愆冥無狀汨沒於時亞麾洙泗之交日迷簿領極目河
山之阻時曠音騰伏惟坐布寬條翕膺景福恭以某官
中和迪哲亮直秉彛學究天人文經邦國才為時而擬
出道遇主以大行載筆記言未殫於儒效靈章請郡將
布於主恩雖光書錦之行尚淹英袞之命佇膺迅詔還
踐嚴塗

代問候許州相公狀

猥瑣無堪生成有素亞外諸侯之守日奉詔條仰大丞相之尊應塵牋牒伏惟布黃堂之政事卒泰宇之福禧恭以某官勛濟王塗器包民極才為時而挺出道結主而獨深首翔台路之嚴親輔帝期之盛登用良峻裁抑貴權講潤典之所未行讓元功而不知有亟露章於宸宸願還印於宰廷萬民具瞻方依於周尹一相處外俄殿於陝郊幅負渴鈞治之仁朝廷思體貌之舊行膺徽冊歸宅元台俛惟允微庶乞琿造

問候通判都官狀

阻待坐隅倏彌旬浹崎嶇末局固奔命之無休引遡崇
麾惕進音之滋緩仰維坦履翕受繁禧恭以某官名高
王朝學際聖闡貳車贊治聊鬱於聖圖細扎須才行趨
於帝所

代問候青州賓政狀

荏苒外麾徘徊末路門墻愈遠慮遺疏冗之蹤牋牒不
時懼免高明之聽企台光而且邈馳愚想以滋深伏惟

靜鎮善藩益綏恭字恭以某官際天蘊識名世標才宰
樞廷之密謨專將聞之外制恣殫碩畫歷樹豐功天下
已安暫休于廟畧方面之寄屈布於藩條諒五月之政
成即三篇之冊拜

回崔判官權縣

右某比者方效小官獲棲大庇偶沿臺牒暫領邑章撫
弱植以疇依歧餘光而日甚豈圖高誼猥貺瑤封何其
賁飾之多無乃謙撝之過永惟感服曷究名言

待答王待制狀

右某向嬰郡事罕奉郵音阻敘暄涼仰諮寢饋豈圖恩
獎猥占教文恭以某官經世偉才摺紳碩望時政有大
利害莫非昌言宸謨之日坦明多所潤色行膺鈞軸之
拜少慰幅員之瞻伏望上為闕廷精調燕起

代答秀州聶郎中狀

右某自遠朋簪向紆守紱豈謂不移鄉閭之舊曲有牋
滕之貽兼承坐布藩條舉臻茂福恭以某官早紆賢業

自結主知擁麾東南已擬郡治之最奉召旦夕行被朝
僉之榮伏望精調燕興俯慰瞻頌

代答趙虞部狀

右某近者伏遇被命出都假道過泗輒緣門下之舊屢
獲坐隅之趨虛襟以容雅眷無替而復諒其孤進每有
先容俯矜滯蹤力發薦口自遠去於德蔭庶少披於感
悰賤介遠還誨音首及拜而伏讀藏以為榮恭以某官
當代鴻儒薦紳碩望郎垣應宿早愜於輿言侯服亞麾

尚淹於遠蹠停宸檢之褒擢復相之光華俛惟冗微鎮
卜棲倚伏望上為宗社精調燕興

代答陳都官狀

居鄰善郡日庇餘光竊聆卓馬之朝入近蒼龍之闕未
遑馳慶先辱流音屬先序之方中企賢規而寢邈即膺
甄擢倍萬和調

代答知宿州朱司門狀

嚮繇頃驛之臨嘗拜珍函之辱旋沿臺牒往督漕舟行

李淹徇日月逾邁抗塵無狀裁記不時恭惟順履初炎
翕情純福善藩布詔方著於能聲溫檢須賢行躋於華
貫勉遵時序倍保興居

回諸官狀

王正謹始天吏肇和欽堯歷以授時稱漢觴而薦壽恭
以某官親逢盛際早歷榮階屬開祚之膺辰期自天而
集慶永言瞻頌曷罄指云

代答運使任學士狀

拜嘉至渥冒職如初鎮鞅簿書之勞絕攀臺閣之軌豈
圖恩照首占教文伏承給食中都餐和恭守恭以某官
罷函剛實識貫幾深以忠誼結主知以文章重時論然
漕臺煩使誠曰藉才之司而書殿詞臣決非久次之地
行祗迅詔入踐嚴途

代答湯都官狀

向緣朝謁屢違賢規去德未遐瞻風滋劇旋承新命榮
領使麾方列慶函遽貽誨牘恭以某官才猷懋美政術

修明早踐清郎之塗游揚循吏之目第甘泉之最狀允
格聰聞旬甌閩之巨邦行旌治迹趨承匪邈企引蕪常

代答王承旨狀

伏蒙遠紆公幹垂貺鈞函不遺外補之蹤曲損大臣之
體拜而伏讀藏以為榮恭以某官王佐偉才天元粹氣
以文章甲賢選以忠誼結主知飛綏金馬之庭早揚仙
貫視草玉堂之署密暢宸謨日奉威顏益隆體貌台星
兩兩行正坐於熒煌尹石巖巖自副時之瞻矚

代答淮陽知軍司門狀

伏審祇被恩書榮臨治屏寸襟增忤餘潤焉依恭以某
官識蹈大方氣陶至粹妙年結綬蚤著於能名列郡鎮
麾方凝於美政行甄最將亟踐嚴途某適守陋邦獲隣
善壤未遑馳慶首辱占音媿躍兼深名言非諭

代答招信羊寺丞狀

伏審肅即便辰已臨劇邑坐席未煖早騰治聲闔境相
懽謂得賢尹方茲竊忤遽辱流音感媿并深名言非究

代回新知楊州張學士狀

伏審就蒙細劉移鎮巨藩伏惟慶慰恭以某官才貫幾
深量函夷雅蚤躋朝綬之貴久踐書林之游領漕節之
輸將叅財聞之經畫善狀連最高懷愈恬益隆天子之
知交上柄臣之薦尚稽顯任猶布寬條然主袞儻來靡
嬰於素志而江山有助行適於清吟弗須坐席之温佇
被鋒車之召未遑馳慶先辱占音媿喜交懷名言非諭

代答詳覆陳著作狀

伏審茂對明縉榮躋秘局伏惟懽慶恭以某官器宏才
博行潔文醇游泮決雋科未紓賢蘊掌漕臺之通庾遽被
更書由省戶以詳刑適當滿歲亟從宸陛之對擢踐道
山之游未列慶函首紆珍牘永言媿忭曷究名云

代答揚州張學士狀

近者伏值某官賀言于藩道出茲土獲賢規之觀止愧
主禮之缺然旋聞肅東剛辰榮開尊府將迎鮮暇日謹
教條之行企忤交懷尚稽牋牒之奉豈圖恩照首占誨

文伏讀以還兢慙靡措仍審肇班寬詔翕萃繁禧恭以
某官業履淳修才猷高爽踐書林之清切久別嚴途總
漕節之輸將累持重柄洵臨臣屏增煥豐功旒宸知名
素嘉恬退之節朝廷倚德行承迅召之音

代答舒州林龍圖狀

疆堠相望第風猷之仰止簿書紛委媿音記之缺然豈
謂曲代愆儀自敦高誼乘偃藩之多暇飭記室以占書
何其賁飭之多無乃謙撝之過恭以某官薦紳耆碩經

士偉才親對休辰薦揚美化登禮司之少列增重卿聯
叅延閣之榮班有光儒效眷舒人之故國分漢守之左
符藩漢須賢暫勞於君重朝廷圖舊行被於帝咨

代答盧郎中狀

向塵賓席獲吏淮州適逢耆德之英出共本朝之理大事
決於庭下率任通明短才備於幕中訖無云補第積官
瘵之慮敢圖公舉之榮過被獎憐狼形慰薦旋違恩館
鎮奉臺符奔走道途淹徊歲月塵勞之狀早冗而可嗟

起居之音濶疎而不備寄顏有覲論感無涯豈謂自損
達尊首頌勤誨拜而伏讀藏以為榮仍審恭守甚休景
福如名恭以某官行推高爽識貫幾深付古諸侯之權
洊更重寄著漢循吏之目行光直書

代答杭州呂舍人狀

近玷茂恩驟塵劇使事經多目悉究寸心簿領盈前曾
無虛日慮紓悃幅少謝獎延豈圖乘偃藩之多餘飭記
室以占教祇服謙亮第勤媿藏恭以某官德履蹈中智

謀經遠蚤陟雋科之首涪揚仙貫之華載筆嚴塗壓司
於外命請麾要郡樂布於寬條然而先一州為大用之
階辭累日乃高賢之致鈞衡之委旦夕以須

代答新運使學士狀

伏審就解守符復持漕節顧惟無狀方此按章獲使範
之焉依增愚襟之竊忤未遑馳慶先辱占書祇服謙勤
第深銘若登車攬轡矧視事之初輓粟飛芻疇庸之
最餘留瞻仰以託悃悰

代答青州相公狀

伏審相公光被明緡就更巨屏天下億姓雖失於堦鎔
京左數邦獲繫於鎮撫側聞成命竊忤塵襟因啟慶於
單函懼瀆尊於上袞豈謂忘公台之絕禮命記室以賜
書拜讀以還兢榮靡措乃審高秋貫序鈞履餐和恭以
某官社稷宗臣山河間氣均股肱之一體挺金石之純
誠備紓賢業之高亟踐朝班之劇廟堂之上雖利澤之
素行藩屏之間欲教風之親及即膺徽冊還秉大鈞夙

荷陶甄曷勝企抃

荅通判都官狀

自違盛德倏越兼辰伏蒙特忘位貌之殊首錫誨言之
重惕然拜賜藏以為榮伏惟頌泛齋舫舉綏泰宇恭以
某官學請聖間名高士林關掌郡符豈稱高賢之蘊翺
翔書殿茲為美職之官伏望倍衛燕興少平瞻頌謹奉
狀申謝

荅知軍郎中狀

久阻賢規應馳公牘豈謂乘徂藩之多暇命記室以占
音禮意過勤感藏增劇恭以棊官鐘氣間傑為時老成
軍壘班條衆起潛郎之歎璽書褒績行光循史之稱連
服徽章倍綏冲履瞻依之懇諭述奚殫

荅蓬州僉判方中舍狀

近會高車甫經陋邑夤緣世舊邁晤風期少釋愚心之
傾獨羞主禮之缺違顏未久占教致三自損朝廷之達
尊弗遺州縣之勞賤禮緣愛厚感與幸并恭以棊官材

猷懋明襟致夷遠屈能大幕聊繫婉畫之精考謂巖宸
行被華章之寵益綏燕餼庶副瞻祈

荅方寺丞狀

向以非材之資久承旁縣之乏簿領勞止鎮汨於塵容
熒函欽然第傾於賢檢豈圖謙眷數枉誨音遠貽窮海
之鮮申貺秀林之實拜賜甚渥貢書弗時尚持粹襟之
寬未識苛禮之廢恭以某官才猷蕭給方格淳修劇邑
字毗甫成於美謂明廷考績行對於茂恩倍保燕興少

符瞻頌

荅方秀才狀

某名在州縣沮壯氣以無餘賤如塵泥分英才之絕顧
豈謂方君先輩特敦高誼遠枉珍函褒假過優諒緣於
誤聽庸愚自揣有激於加修多滲貫辰燕興迪吉行摠
素蘊平挹顯科瞻頌交深文陳非悉

荅范仇香狀

自遠朋遊倏茲累月徒勞吏職曾靡定居媿書禮之缺

然遽誨音之來止益知雅契之篤兼審粹襟之和恭以
某官方格淳修才猷膚敏大邑從政猶未暮年當塗交
章計在匪日

荅王交代狀

鄉竊恩章濫紆宰紱考格垂滿治材本疎賴有後來之
賢將更既往之繆永拜新命稽修慶函豈圖隆譙先占
溫教恭以知縣秘書氣得天粹學鉤聖微早交諸公之
章可知一邑之政上心嘉乃遽降於俞音萬目顒然佇

觀於新治益綏福履行服褒華感頌所叢名言非悉

荅東陽韓中舍狀

進膺明詔出宰劇封方列慶函繼紆榮牘兼承撫字之
隙坐擁福休之繁民口交驩適歌於新治官居甚邇幸
竊於餘光倍保宴興少平瞻嚮

荅滕廷評狀

某名在俗吏跡疎時賢青雲得塗因觀民足之遠黃綬
為邑益覺致身之卑敢圖高明弗有貴重親占溫教欣

奉仁風讀竟感來榮存辱去無審協班寬詔坐擁繁禧
恭以某官道具醇全業包康濟歷試藝文之要連陞科
等之優別乘雍容豈需滿歲嚴塗陟降其在匪朝

荅丁著作狀

自違風檠再見歲除旋承茂對明綰顯陞秘局迄無暇
日阻列慶函取圖通明弗爾簡棄遠頌溫教垂賁寒蹤
其為感藏豈敢忘去恭以某官量函夷雅學探本源金
馬之廷方叅於華序石渠之府行攷於秘文歲篇幾終

天和迪吉永言瞻頌曷究指云

回諸州守倅遠迎狀

國賓戾止適修迎榮之常道主勤斯遽枉撫存之問卽披賢矩併敘感悰

回不經歷州軍守倅遠迎狀

張殖表事莫遑枉道以瞻風搖旆馳心遽辱移書而講好永言感慰第極銘藏

回移厨狀

方趨長道適次巨封過蒙主道之勤特置公庖之腆仰
銜厚眷竊謹中藏

代答滕廷評狀

偶逃官曠猥玷序陞敢圖名世之賢首講珍函之好誨
辭溢美感臆兼常恭以通判廷評學鉤聖徽才適邦選
果符輿論之屬進列鼎科之榮別乘雍容扉需於滿歲
嚴途陟降計在乎匪朝伏望上為邦家精調燕餼

答福建轉運曹司勳狀

此玷茂恩併加誤寵擢司內命假尹中畿猥蒙慶問之
流第劇感懷之摯恭以某官才猷膚敏風績宏長領南
服之輸將贍大農之調度行甄美課益保粹襟

荅慶帥孫給事狀

伏審茂對明緡顯陞瑣闥側聞成命竊忤丹衷恭惟某
官經世偉才際天遠識蚤紓碩畫屢懋膚功旋易左符
暫勤西畧總兵民於一道穩若長城肅號令於諸蕃晏
然外圍詔音非晚柄用其時少副瞻祈益綏燕起

荅雄州趙都使狀

伏審顯承恩詔增峻使聯首頌榮教之臨差媿慶函之
緩恭惟收勳遠畧倚重要藩用威愛之兩端督戰耕之
大本坐陞禁衛行擁節旄感頌并深名言奚罄

代馮內幹荅鄭州王防禦狀

近者靈輿西引吉仗東旋往來要邦終始大事靡闕百
須之奉率繫千慮之周坐以享成居然備使仍首貽於
誨牘誠過篤於謙懷臣節益明茲不忘於忠孝君恩雖

大知有報於生成，欽佩無深，名言非悉。

荅棣州王學士狀

假尹神都之劇，日費剗裁，懷賢治壞之選，居深馳嚮，迥存高誼，首賦珍題。秋老氣清，益綏寧於素履，才完行潔，將陟降於華塗。

回燕王狀

適驅軺傳甫次都所，猥蒙禮意之先，特損書音之貺，仰銜撫挹，增劇感藏。

答副使狀

駕言卑傳道出別畿特枉珍題良約謙懷之篤弗遺未
介第藏感臆之深

答留臺崔籍庫部先狀

伏審茂對恩章榮持留憲未塵慶牘首降誨函仰重意
之所臨戰懦衷而無斃恭惟留臺庫部鍾氣間傑為時
老成暫均佚於分臺足增輝於列宿即諧參對倍切欣

翹

答耀州知府樂少卿狀

某素乏吏能繆參帥畫屬方祇於官局曾未列於公函
敢謂自屈名卿之尊不忘故吏之眷首頌溫教垂賁寒
蹤伏讀再三感藏千萬秋炎尚熾時社載蕃恭惟知府
少卿不世壯猷為邦雋老寬條所布方坐鎮於善藩大
政其咨行召還於舊德

盧郎中狀

頃備下僚僅彌耆歲沐仁侯之撫愛均國士之獎知遷

會露章聖求易郡俞詔隨下孤蹤失依尋伏枕於踰旬
方驚困篤迨解麾於舊服莫遂留鎮為吏職之榮缺
爾公函之奉仰惟純履舉集醜休恭以某官王國偉才
郎垣碩德甘泉奏治狀之最宸扆嘉老成之風行被褒
書驟陞近署

田省主狀

語才亡狀蒙顧有年何幸走於江淮倏淹徂於日月門
墻愈遠分遺冗外之蹤牋牒不時慮况高明之聽伏惟

坐籌大計舉擁繁禧恭以某官才貫幾深器函剛實雄
文取重於時論大筆追還於古風親逢聖辰獨膺賢選
究國體而指人事已擅著篇之竒潤神化而輔帝猷尚
淹當軸之效矧計庭之上笏即台袞之便塗匪朝升庸
為世休福

又

恭以某官方格淳修才猷膚敏雄文珍策早奉對於大
廷要職美官遽垂光於當世傑識即以照今古重計足

以尊邦朝雖上知之甚明顧賢圖之猶鬱主謀才府暫
緊經畫之奇兼秩禁局聊稱文章之實矧觀已試之效
宜被非常之恩詔冊發中宰衡升用手陶坯冶之化大
副幅負之瞻開祚膺辰自天集祉某預外臺之將漕方
備屬官祝南山而捧觴夙違私懇

又

罷能無取蹤跡本孤早被恩憐力垂振拔雖日馳牋牒
曷殫感遇之懷而鎮鞅簿書尚缺問安之禮伏惟生籌

邦計翕萃天和恭以某官行潔性醇德宏業鉅高文大
冊優踐於賢科美職要官進揚於聖世兼禁局之嚴密
主財府之經宜富國澤民皆出著篇之素秉鈞當軸未
紓經世之才矧給足於中都行奉承於徽冊

宋侍讀狀

語能無狀被遇最優迹久去門墻之嚴書再徹左右之
聽居常牽吏繼缺問安大臣之量猶江河能容簡曠小
人之背負芒刺第切兢慙伏惟宣布教條導迎禧祉恭

以某官夙鍾間氣親會熙辰歷更顯任之光增重薦紳
之望鬱曾中治安之策猶屈守麾樹天下太平之基行
登台席

李端明狀

支郡下僚西州末介跡一去門墻之峻漫歷歲時耳弗
聞訓誨之餘坐成愚陋宿官無狀奏記因疏豈謂自損
台巖首傳教旨孤蹤知幸淪髓銜恩伏惟頌履初炎翕
臻景福恭以某官夙鍾間氣親邁熙辰蚤陞祕殿之華

久踐禁局之遠華要之選翺翔殆周名重薦紳道結當
宸然文章之任已極於儒榮而鈞軸之嚴未平於物論
行膺徽冊亟宅上台

南京歐陽龍圖狀

按章郡邑鎮為簿領之勞馳想門牆俄慮音滕之奉伏
惟肅班寬詔舉萃繁禧恭以某官名世標才際天蘊識
屯夷殊致明哲惟均自結中宸之知早躋內閣之貴幅
負億姓願託於國鈞藩屏一邦尚司於宮鑰時議雖鬱

主心已傾諒五月之政成即三篇之冊拜

與王交代狀

近者使還貢書計已徹眎吏冗鮮暇績疎問安伏惟待
次多餘練神增裕恭以某官道具醇粹學探本原聚以
藏身為士君子之守施之有政得古循吏之風益輔夷
襟行光遠躡他留瞻奉併託悃悵

與王交代狀

末吏淹期方盈於媿汗高賢廣度遽錫以誨音審履春

陽益叢天社終朝北首以頌華馭之來曷日南軒俾釋
芳襟之望餘留覘拂併寫悃忱

發運張司封狀

解印小邦還臺累月京塵汨沒益嗟俗狀之勞書舍缺
陳第企賢規之粹歲華方晏福履攸寧恭以某官簡厚
凝姿中和秉哲周才足以了大事敏識足以照羣疑中
外僉言當踐嚴塗之祕東南重計尚煩碩畫之精靡俟
終更即祗迅詔俛惟瑣品蚤預同升欣頌兼常文陳非論

河北運使李司勳狀

伏念某葺爾孤生斷無他術委身屬部嘗蒙慰薦之再三
碎首思闕未報生成於萬一自違門下承乏淮南素
號僻州了疎便驛牀音滕之不講第顏汗以無從竊恃
兼容之私弗誅苛禮之廢苦寒貫序恬養餐和恭惟某
官業履純修才猷膚幼蚤揚膺仕獨映熙朝眷言北道
之雄尤慎外臺之選亟圖籌畫專領輸將適此登車沛
然餘刃行瞻中都之費坐澄列郡之源雖使節觀風誠

周才之允屬而相門襲慶矧前烈之未墮即踐嚴塗行
參妙選敢因毫素用寫悃忱

樞密吳侍郎狀

恭惟樞密侍郎文經邦國學際天人親邁唐虞之盛期
獨懷晁董之珍策危言切指蚤奉對於大廷妙畧參陳
適運竒於密幄登庸之選倚立以須迎日在辰膺時納
祉某素叨獎拂方總翰將揚馳慶以無階第頌言而滋

劇

副樞吳侍郎加禮部侍郎狀

伏審祇承制命增峻台儀進啟天子之光登踐春官之
貳伏惟慶慰恭以樞密侍郎氣鍾間傑道具大醇體安
素履之休德蹈黃裳之吉危言珍策講重計以尊本朝
勝算偉謨經遠猶而裨宥密早被先皇之用重膺繼聖
之知特錄精忠亟加顯秩惟是常伯以為亞卿逖聞成
命之行彌增寸襟之喜

代與發運楊郎中狀

進玷茂恩往祇煩使霜顧官能之疎短寵愈憂深向陪
尹政之浩穰力隨神耗逃責弗暇投閒乃宜敢虞詔綵
之頒輒與漕臺之寄尚繫厚幸將底末光屬炎律之貫
辰諒粹襟之迪吉恭以某官量函夷雅才際幾深董山
海之輸將方圖碩畫瞻邦家之調度行懋膚功靡俟終
更即趨迅召

李侍制狀

為郡事煩寓書禮曠仰惟吉履俯萃醴休恭以某官才

貫幾深器玉剛實雍容通綴暉映端朝侍帝閣之凝嚴
方繁潤色掌天銓之華要適賴持平

田侍制狀

頃吏西州屢瞻崇飾玷塵慰薦之數蒙被顧知之優旋
去思閔漫踰歲齋曠奏書而啟感姑引脰以傾風述料
燕興翕臻禧福恭以某官民靈先覺王佐偉才親邁穆
清之期游更繁劇之委迅躋內閣孤映端朝然潤色宸
篇末殫行事之效而頒條侯服庶見澤民之為

代答兩轉運狀

叨貳屬封獲樓巨庇輒論榮遇虔貢幽緘方積瀆尊之
虞固無還教之望豈圖恩獎嗣損音題三復以周一謙
斯在仍審提衡外計按治列城素履攸寧蕃禧紹至金
穀登羨適底中都之饒綸緯褒嘉行膺大柄之委伏望
為國自重以時考祥

諸路轉運狀


比塵劇使蓋出曲思曾無經畫之明率藉輸將之助受

署累月貢音後時伏惟坐籌邦計之繁翕受天和之粹
恭以某官才猷膚敏方格淳修漕節澄清方凝於最狀
宸緝溫厚行服於褒章瞻頌交深名言非論

代賀提刑主客改轉運狀

伏審國計須才朝簽議可榮膺宸詔就改使麾伏惟
懋恭以某官當軸慶枝薦紳碩望親逢真主之運早踐
列星之垣忠誼秉心術業經世按祥刑於列郡多所平
反第美課於嚴宸益隆委寄重中都之支度領南服之

翰將運心計而有初簡聰明而非邈俛惟孱品方託巨
庥聆邦家之擢賢惟增距躍如犬馬之慕主尚戀恩暉
適守官常阻從賀列彌深企抃曷罄敷陳



欽定四庫全書

集部

祠部集卷二十二至

詳校官庶吉士臣朱理

檢討臣何思鈞覆勘

總校官編修 日朱鈐

校對官編修 日高棫生

謄錄監生 日朱一鳴

欽定四庫全書

祠部集卷二十二

宋 強至 撰

啓

賀韓魏公生日啓

天地新秋山河間氣挺生上相允屬初辰恭惟判府司
徒侍中一代宗工三朝元老大忠自任直道不回經世
措時動以作民之膏澤積功累業需然享國之寵榮頌
避崇高懇圖偃息油幢仍歲去為素里之光英袞何時

歸慰蒼生之望適臨誕日鈞祝週年某待次京師馳情
門館捧壽杯而莫及臨慶幅以徒虔

賀中丞啟

審膺邦選入總臺綱風憲有歸朝言允協矧為正德夙
秉睿心偉業之致青雲徧揚要路精忠之貫白日行啟
危言繇霜簡之抨彈參國鈞之宰制適聞成命竊忭丹
表

賀梁參政啟

伏審發詔神庭登賢鈞席埏銘所及歡忭惟均恭以某
官勲濟王塗罷包民極鄉參憲府進貳樞廷感會帝宸
綢繆公路亞上公之劇序密贊邦權隱真相之偉才弗居
廟略稷高惟已羲軒吾君佇正宰衡之崇永堅尹石之
望某職貳藩服跡遥廟堂有地生成無階慶蹈

又

伏審帝詔登賢宰廷亞序埏陶所暨歡躍惟均恭惟某
官才貫幾深罷函剛實旦暮聖辰之會翺翔朝弁之華

青瑯之門蚤光於寵拜鴻樞之府參掌於藩機驟改思
書往陪鈞席圖講治安之策今也其時樹立太平之基
決於匪日益紓賢業亟正台躔某總計外臺瞻風上笏
側聞新命竊忤私悰

賀北中韓侍中啟

天地之交曰泰卦氣云臨春秋之一為元歲功斯起恭
惟判府司徒侍中際天傑識許國純忠擺落元勳而弗
居徘徊舊鎮以自適一道之蒙和氣亦既有年三階之

復台躔諒當匪日適丁開祚誕擁麗禧某方位財闡正
遙恩館第劇壽康之祝阻伸慶謁之虔卑情無任激切
瞻頌企忭之至謹具狀賀

賀郭樞密改留後啟

伏審顯奉宸恩峻遷台序凡叨暉庇均集欣愉恭惟某
官偉略沉雄傑才英邁襲汾陽之祖烈傳地上之兵符
旋入贊於神樞亟出臨於帥路疆事所制輟帷幄之運
籌國威以宣寬朝廷之西顧增重庶車之秩繼收盟府

之勲行被詔音選圖廟畧

賀潭州任待制啟

比承恩數出總利權鎮鞅簿書缺馳緘訊伏惟坐班寬
詔翕萃龐禔恭以某官莊重自居直清不倚蚤聳端朝
之望遄陞延閣之華貳職財聞有關經畫抗章法坐多
所建明乃春長沙實惟巨鎮暫繫耆德往撫遐氓諒五
月之政成即三篇之冊拜伏望倍綏燕鍊少副瞻祈

賀東陽侯秘丞啟

伏審就拜上恩進丞中秘伏惟慶慰恭以某官氣鍾間
傑道具大醇聊試治封之繁頻登功狀之最陞名聞籍
茲漸於華塗易地坤維行蘇於遠俗永言欣企曷究指
名

賀致政少傅啟

伏審中詔推恩上臺得謝參青宮六傳之貴保安車賜
几之榮休風穆然輿情仰止恭惟某官潛德邁種英猷
濟時士林以師保而允懷王室繫股肱而是賴雖大雅

作誦老成重於典刑而高賢所存功名付之天道由是
辭台鼎之機任即侯服而偃藩體貌之隆固不遺於黃
髮止足之計乃獨得於素心遺塵垢於儻來即逍遙於
物外揮金之樂不減於疏公掛車之榮足踰於廣德竹
帛所載今昔同符跋聞英聲側深景行寓跡高門之地
阻親長者之謀仰瞻之誠一二奚既

賀文相公出鎮許州啟

伏審茂對詔音出觀藩政抗使旌而就道露公冕以宣

風仍審肅東便時已開尊府恭惟某官器包民極勲濟
王塗感會嚴宸綢繆英袞宅元台之劇序密暢邦猷紆
真相之偉才究宣廟略已見經綸之效弗居變理之功
懇形讓封求避榮路即膺俞詔均逸陪京躋瑞揆之絕
班加真封而衍食巖巖尹石未移率土之瞻兩兩台星
佇復中階之首

代賀亳州皇甫大諫啟

伏審祇奉詔音肅觀藩政伏惟慶慰恭以某官道先民

覺才為世生出入三朝體貌一德偉謀大政率誥訪於
元龜茂業豐功因享延於優祿寘列諫垣之重洊更守
綬之榮惟景毫之名封實右淮之巨鎮暫勞君重班宣
寬詔之名行副帝咨陟降嚴塗之遽調元台鼎均福名
區俛惟冗官適貳支郡庇台光而有所就賀列以無階

代賀龐昭文啟

伏審廊廟須才朝廷倚德誕頌明制登踐元台徽冊傳
聞薦紳抃躍恭以某官夙鍾間氣親對休辰文章致身

忠誼結主宣邊陲之遠畧早底豐功陪樞幄之偉謀旋
承顯命陟降王塗之祕綢繆台路之嚴參正論於中階
密裨政闕歸成能於上袞弗有賢能帝意愈傾物議加
重果膺寵命升總大鈞行將專講政經深謨王體三光
澄渙百度清明措國至隆比元和貞觀之治躋民有謐
若大度赫胥之年示函夏之具瞻臻宗臣之極致某適
縻守紱逖遠台符有地坻鎔無階慶蹈

又

伏審祗膺冊命弁總鼎司體貌益隆幅員均慶恭以某
官清廟偉器上天元精早會遇於帝宸恭鼎謨於鈞席
密裨宰論退隱賢謀第觀幾務之成勿耀經綸之迹物
論加重主知愈明果被恩緝首躋袞路圖謀治安之策
今也其時樹立太平之基決於匪日追臯夔之極致永
民庶之具瞻某職守侯邦迹遙台座側間承命竊忤私

悰

代賀董度支啟

伏審中宸降命外計委才行美歷之馬依增懦衷之竊忤
恭以某官氣陶至粹識蹈大方以器業之深取重時論
有公忠之實自結主知參財府之劇謀陟星垣之要秩
董淮州之轉給素號才難議漕節之登延果膺帝簡行
將攄發智略講求事經金穀羨饒力瞻大農之用兵民
給足佇蒙細札之褒俟拜崇麾併紓丹悃

代施大諫賀龐相公啟

伏審就膺徽丹升總大鈞體貌益隆幅員胥慶恭惟某

官罷包民極勲濟王塗秉忠諒之一心出誠明之正性
鼎綏邊閭進貳樞庭感會帝宸綢繆公路亞元台之劇
序密贊邦猷隱真相之偉才弗居廟畧物論加重主知
愈明果被明綸亟登上袞稷高惟已講圖萬化之原義
軒吾君拱揖九筵之上躋太平之極致永普率之具瞻
某職總漕臺跡遥政府無階慶蹈有地埏銘

代賀唐中丞啟

伏審茂對制函榮躋憲府四方相慶萬口一辭恭以某

官王佐偉才天民先覺毅然立朝之正色外嚴秋霜直
哉致主之精忠上貫白日向收康濟之蘊出總翰將之
權旋倚重於邊藩曾甫安於坐席亟承宸綍入領臺綱
彈疏未陳已破姦回之膽諫言即發當開睿哲之心至
治之風復觀茲日俛惟愚品嘗底台光抃躍兼深敷論
奚悉

代賀田諫議啟

伏審疏渥宸緝陞華諫闈側聞新命竊忤丹悰恭以某

官莊重自居直清不倚以函一之德會泰寧之辰游歷
事權率凝績效遽由內閣之秘驟置七人之聯青蒲伏
規佇禪當世之闕紫芝頒檢徑宅元台之榮曾是冗微
最叨知獎矧聆進擢倍切忻懽

代賀知郡屯田啟

伏審善諷剛辰榮開尊府矧叨暉底實倍欣愉恭以某
官才貫幾深器函剛實親逢文雅之會優踐秀廉之科
千里班條適據於素蘊一封祇詔行對於寵褒

代賀運使祠部啟

伏審光奉明緡就移要部側聞成命竊忤塵襟恭以某
官識貫幾深器函剛實親逢文雅之會游擢廉良之科
緩書殿之貴游領漕臺之重寄然金穀大計誠曰藉才
之司而朝廷急賢決非久次之地俛惟孱品將託臣庠
企引兼常名言匪喻

代賀運使向郎中啟

伏審祇承恩詔榮改使麾幸臣庇之馬依增寸襟之竊

忤恭以某官夙鍾間氣親邁熙辰秉忠諒之一心出誠
明之正性登車攬轡行澄叙於官聯輓粟飛芻佇羨盈
於邦計函膺宸檢之褒擢追復相門之光華企頌交深
指云非悉

代賀運使吳舍人啟

伏審運使舍人顯承恩詔就領漕臺大底焉依寸襟竊
忤恭惟某官德宏業鉅行潔道醇學際天人之交文經
邦國之體珍策重計施諸當世而可行要職美官不由

累日而自致陟降王塗之秘翱翔諫署之嚴買臣懷章
方建守麾之樂孟博攬轡遠持使節之雄諒坐席之未
溫即追鋒而趣召發揮國論潤色宸猷俛惟孱冗之蹤
託託甄題之賜阻從慶列第劇懽悰

代賀新運使祠部啟

右某伏審改命中宸提衡外計將繫暉底倍切欣翹恭
以某官名世標才際天蘊識親逢文雅之會繼擢秀廉
之科心計素明聊寄漕臺之任詔音行及亟從書殿之

游伏望上為邦家精調寢饋

代賀運使度支啟

竊審邦計頊才朝僉議可榮膺震檢就改使麾伏惟慶
慰恭以某官識蹈大方氣鍾至粹親逢真主之運早踐
列星之垣上知素明自結益固屯夷殊致忠誼惟鈞班
寬詔於兩藩未嘗煖席按祥刑於列郡方爾下車遽奉
明緡往臨要郡然漕臺分寄誠曰藉能之司而宸扆念
賢諒非久次之地某適緣奉會方託恩暉旋聞拜嘉陰

懼奪底喜戀交集名言匪終

代賀運使司封啟

伏審進被恩綸出持漕節行棲大庇竊忤丹悵恭以運
使司封經世偉才薦紳華望按章侯服素號平反贊法
王畿多所建白風績彌劬上知愈明果膺尺一之書專
領東南之計登車即路屬部瞻威董山海之輸將方繫
碩畫瞻京師之供億佇奏豐功陞踐嚴塗聚光大任某
宿官無狀守邑云初幸素旆之馬依罄愚襟而非諭

權揚州運使刑啟

某無堪之質棲庇有年備蒙務憐獲保孤冗念簡書之
營慮曾靡寧居顧牋牒之間安生成曠禮尚繫寬置弗
爾擯遺恭以某官職局淵宏才謀膚敏暫屈使臺之重
往臨督府之雄董金穀之輸將矧煩經畫布詔條之寬
厚聊藉撫柔

江東運使張學士啟

伏審就奉宸緡仍躋仙局逃聞成命竊忤丹悰裁賀贖

以尚稽媿珍函之首及恭惟外臺繁使頻成第課之優
東觀昔遊遽復載言之選蓋上心之圖舊推思數以旌
賢領漕節之澄清諒非久次踐王塗之嚴密行服徽章

代賀正上安撫舍人啟

恭以某官偉略熙朝純誠結主早逢亨會洊歷榮班蘊
頗收之材謀尚稽顯用將唐虞之仁恤以慰羣元行休
乘傳之榮入被登臺之拜甫臨首祚誕擁麗褫某茲亞
守麾正遙使旆祝南山而為壽適阻前趨貢兼幅以叙

誠奚殫下悃

代盧郎中賀冬啟

右某伏以盛儀亞歲寶典履長曾史載夫望書羲易記
其來復恭惟某官夙鍾間氣親遵熙朝茲道迎於令辰
期集受於繁祉某適司侯服夙遠賓除瞻頌攸深文陳
匪悉

謝轉著作佐郎啟

第課非優僅應有司之常格拜嘉甚渥遠參祕局之後

塵才無一長顏有餘覲越對明命實尸寵章竊以此官
置員由魏及晉厥初到職必撰次於名臣於爾為羣皆
洽適之故老後世寢革空名獨存目不窺金匱之文足
不踐石渠之地雖異實能之投亦沿舊選之華苟容冒
居安允清議某也曲士今之愚人磔史裂經姑欲自售
曼辭陋句輒為象傳耻用是而獲名竊改圖而蹈道方
將劇當世之務以為事業發諸儒之蘊以為文章宣涉
學之淺源及得科於下綴一落選部七經潤年間嘗補

掾淮州字人巖邑再泣喪親之血幾灰向仕之心奈先王之禮制莫踰矧諸公之薦書猶在勉就銓集許從陛趨漫思昔官曾之善最濩落待詔兩新華春兢虞黜幽都絕榮望忽甄擢於無意抑生成之有階此蓋伏遇某官樂育士倫力開公道市骨而圖駿隨器而取人仰體額能之懷俯援振滯之手卒全駑質亦玷龍光敢不允蹈攸箴益堅所守弗隨草木而泯滅誓竭涓塵而報償捨是以還未知所措

謝密院啟

濫被茂恩，亟塵繁使，揆能非稱，受命惟驚。况獄理最幽，吏端多弊，或考情不實，煅煉以成辭於法，未安芟夷而取當及具文而來上，紛累牘之盈前，自非通敏之資，奚究重輕之失，竊念某天姿滯固，才具迂空，幸襲世芬，早階仕級，寢尸榮於秘館，久與俊游，鼎假守於僻藩，自安愚分，思復寬閒之地，以全踈拙之圖，豈謂天造誤知，朝言曲獎，俾按章於列郡，副慎罰於中宸，靖言忝塵，厥有

緣自此蓋伏遇某官協宣垓治對掌樞衡興勸有能助
開公道謂刑哉事重有軫朝廷之仁謂愚者慮專宜顧
簡書之冗至思難報孤抱如何誓輸委質之勤力踐盡
心之訓上酬覆燾并答埏餽

謝通判國博啟

右某啟累日前伏蒙通判國博奉舉某堪充京官任使
者僻邑效官方虞幽黜當塗薦士遽預名聞望有所踰
幸無與擬竊以本朝圖講至治延登衆材尚慮援孤者

或泯於當時業遠者翻沉於下列思盡甄陞之實乃嚴
保任之科及夫私謁既行公議不復高門或被汲引悴
族或遭棄遺間有非常之賢時排既久之弊言若衡石
審量於器能心乎國家甄拔於寒畯欲允清舉豈容匪
才如某者涉學淺源得科後綴謹廉自信竊類於古之
愚峭直少儀弗宜於今之世曷從銓管補掾淮州民獄
固繁殫修於賤職使臺交至灼見於鄙心薦者凡五人
奏可移一邑眷茲陋壤越在窮山雖牒訴究懷時有一

得而衣冠過境歲無幾何尚安善治之聞以動上官之
聽豈圖采擢輒及鯁庸靖言載惟厥有攸自此蓋伏遇
通判國博力澄官品協布政條隨器而取人市骨而圖
駿遂收一介之技俾出大賢之門敢不允蹈攸箴益堅
所守刺求吾俗之瘼鋤剔厥民之姦庶幾立身以報知
已捨是而往未知所裁

代謝兩府啟

誤奉朝恩越叨臺職揆能弗稱竊幸惟驚復念某擢質

本微賦才非粹蚤緣曲藝進躡茂科字兩邑之遐眎孰
宣上化補一官於赤縣遽遘親喪旋及外除復塵舊物
短才未試善狀何甄會通漕之浩穰議增佐職蒙茂恩
之陞擢使備乏員夙夜協心毫釐底績偶登歲課僅免
官瘵均異數以精勞愧無功而冒賞就加冗秩猶曰尸
榮矧憲府之要資假計臺之煩使自量愚分兼卹人言
懇列讓封願還新命繼頌中自趣斷固辭欲避寵再三
懼成於徼譽而拜嘉俯伏竊究於為容此蓋伏遇某官

翼亮天工運平帝緯器人容有不備則長短之才異收
匠物謂無可捐故分寸之勤亦未是令驚猥獲玷龍光
謹當黽勉事為激昂志尚務或干於金穀敢不盡心言
苟利於國家寧忘竭慮庶殫一介之效少答天鈞之仁

代王給事到任謝兩府啟

三秦重鎮七諫要班併忝冒於優恩適布宣於寬詔短
能所据厚幸何勝伏念某素乏才猷偶承器使向或大
農之劇遂參近侍之華解朔野之守度調西陲之兵食

坐席未定籠財曷遑遽被宸緡就分帥印按故都之千里提支郡之十城節制此方得便宜而從事慰安爾衆以綏撫而為名致此假人出於造物此蓋伏遇某官股肱一德體貌三朝持衡宰柄之公登珥王塗之政砥冶所暨方圖畢成本由睿選之須才翻以愚蹤而塞詔敢不博求民隱祇訓戎行允蹈古人之為庶幾循吏之自上酬乾造次答化鈞

代轉諫議謝二府啟

國家接統五聖推恩百工事順考於累朝秩逆遷於一
等亟繇卽位超長諫垣曾是罔功曷勝厚幸伏念某時
名最寡風力不強屢從煩使之行旋二大農之劇遂叨
法從仍頌南服之輸將沈茲踰歲瞻中都之供億
何有薄勞會乾御之天飛覃渙恩而雨施一个之無他
技類獲拜嘉七人之有諍臣遽蒙進位顧乏致身之術
良階進物之仁此蓋伏遇某官體貌宗工股肱新政贊
德音之霈發漸士類以畢周致此龍光及於孱陋誓殫

忠蓋少罄論思用答生成次酬鈞治

代上宋都官啟

近日伏遇某官將朝京師暫館淮泗出於天幸觀止風
猷使車北轅洊更月所官簿堆案慮奉郵音豈謂自損
進尊曲敷高誼忌賤官之么冗錫諄誨之丁寧伏讀已
周銘藏第切仍審餘寒貫序純履餐和恭以某官莊厚
粹溫精明剛敏高文取重於時論大雅追還於古風軒
陛對敬方疇於窳狀臺閣翔翥行陟於嚴塗

代上交代郎中啟

領藩卒歲受代還朝奏課中宸愧絕陟明之覲解麾舊
服嘗蒙敦遣之優契濶踰時政瞻惟日伏惟肇宣美治
誕擁麗褫恭以某官郎署碩才前朝舊德班條千里方
懋惟良之稱祇召一封行膺不次之舉

欽定四庫全書

祠部集卷二十三

宋 强至 撰

啟

代趙閱道待制謝中書樞密三相公啟

總計司之劇部大懼曠官兼法從之後陳兩慙竊寵伏以明君之使人以器當適小大之宜元宰之造物若鈞亦存窳良之別矧此洪河之道是為諸路之先制牙環守者三十六城實煩吏職張口待哺者數萬餘卒尤費

軍須與權之使必也賢器如某者性愚而不可及才短而無所堪親逢聖宸勗起孤宦叅諫垣之未能祇知重國體而敢言領財省之要司不能贍邦儲于既足方負甘泉之責遽塵通漕之榮靖言載惟厥有攸自此蓋伏遇某官丹青元化坯冶庶工取才不求其周所以亦收片善進人欲勸其後所以特用匪功敢不講求利源澄序官品罔有貳事庶成薄勞上酬覆幬之仁次答挺錫之賜

代上參政樞密啟

輪將使權之要論撰儒職之榮誤寵獲兼短才增愧云
初賦事竊懼墮官竊惟金穀之司實佐邦家之費每當
朝中之所選尤以河北而為先蓋邊宿重兵境控強敵
州縣至衆而官屬亦倍隄防雖固而河流靡常軍須吏
稍之所資歲歛月支而僅給付之外計必也兼能如某
者山東齟生天下孤宦早據法令而自效晚喜事功之
可為嘗馳使者之車按章遐服旋總理官之局主獻丹書

比叨邦選之謬思叅董京司之劇務有禁局之老以臨
長得以備員無甘泉之課以黜幽偶云逃責敢圖餽輓
之寄乃屬空踈之徒載惟忝塵良有階自此蓋伏遇某
官協開國論叅亮天工匠物謂無可捐器人容有不備
遂令甄擢施及寒微敢不夙夜以思始終乃職庶收薄
效以答厚知

代上謝宋侍讀啓

某支郡下僚西州末吏傾服大名之日久願見盛德而

跡踈一被臺移往推民訟寓樂邦而彌月方東詔條拜
黃堂之下風蔑諧願望豈謂高明之造不遺冗外之姿
以至命記室以占音飭公牙而說諭鳴咻備至銘刻逾
常遽遠治封尋還賤守營局無狀貢書不時伏惟觀政
多餘毓神增裕恭以某官民靈先覺王佐偉才由妙年
而登科甲不累日而都顯位華要之選翱翔殆周藩屏
一方聊寄中和之詠丹青萬化行摠燮理之才

代問侯亳州宋侍讀啓

某黽勉副車阻遙巨屏訟臺移而奔命曾靡寧居貢郵
訊以問安因成曠禮企台儀而曼邈馳塵想以增勞伏
惟坐布寬條翕臻純祉恭以某官道先民覺文擅辭宗
忠簡上心名重天下而自羽議朝守黼黻辰猷待乙夜
之親程已殫明效宣二天之美化聊鬱賢謀行被詔還
亟陞柄任

代上謝張修撰啓

泮宮領教曾徵善狀之足甄通漕剡章誤謂鄙才之可

取所得出于望外其感溢于情涯竊惟北道之雄是稱
諸路之最上臺之公舉有限屬部之吏員實繁訟牒而
奔走者困于道塗據按而區理者疲于州縣率有忮心
之交騫庶乎薦口之一開援能以勞在義為允某也曲
士今之愚人進乏世資之憑動乖時用之適學雖絕意
于非聖任亦甘心于為貧識軒冕之儻來自安愚分無
田園之歸去敢冒人知尚司闕市之征蓋徇斗升之祿
旋逢上相之居守樂得諸生而養成猥蒙薦書遂置學

館傳道何術真愧人師之妄為素餐匪功了無歲課之
可攷敢望重言之慰藉輒先諸吏以挈提揣躬靡他載
德有自此蓋伏遇某官兼收介善力啓至公重輕士倫
若運權衡之物名教已任首掄庠序之官乃俾鯁生亦
叨清舉敢不益堅素守增廣未聞肯效陋儒惟專翰墨
之際尚須異日自致功名之間庶幾立身少報知己

代上謝徐職方啓

自違風範日詠賢規泐牒他邦未嘗安席奏書下執邈

爾無階夫何恩詔之深數有誨音之及兼審敲炎貫序
緩履食和恭以某官王國美才郎垣碩德素重上心之
眷存臨方面之雄增秩賜金行膺于寵數飛綾鳴玉亟
踐于嚴塗

都官王義甫到任謝史館相公啓

按章北道顧慙薄效之未伸叅計外臺誤謂短能之可
使恩忽推于望表幸茲溢于情涯竊以國家置使于四
方漕運難才于三路咸云河朔之付畀尤繫朝中之選

掄蓋制牙環守者三十四城吏員倍費乎刺舉張口待
哺者數萬餘卒兵餉實煩于轉輸而又河防歲苦于常科
民力日疲于庶役舉是職者豈易人乎宜得衣冠之
賢久知金穀之要不曰冒處始逃深譏如某者受性直
愚與時迂濶仕宦最為孤進器資何有他長徒以公家
之事可為勇于竭力衆人之言不恤要在便時憲車方
懼于竊乘漕柄遽蒙于虛授論資既淺度術復踈省其
由來何所自得獲此假人之寵率由造物之私此蓋伏

遇某官道啓至公人收片善終始成就再三挈提寒苦
頑金首被宰鈞之所鑄朽如散木更煩化匠之為容致
茲要劇之權次屬庸交之品敢不痛殫篤拙稍集事功
有所建明講爾俗爾民之利病弗專聚歛副吾君吾相
之使令

代答平陽方寺丞啓

茲者謬罷小材獲官下邑賴昔高賢之治者及今善政
之存焉民口能言時聞大畧使愚心矜式第守于成規

未暇裁緘猥先賜教過敦禮意增劇銘藏恭以某官業履蹈中才猷彪外進丞卿寺方啓于脩塗出長民封連陞于最狀倍綏燕饒行對褒嘉感臆所深名言非悉

代上樂職方與管御容皇城啓

伏審奉三后之粹容降列真之祕宇順浮齋舸甫次敞封拜德有涯望風竊抃恭以某官早逢熙旦獨映榮班傾忠諒于端朝密隆宸眷肅表儀于禁列增峻使聯餘
避趨承併紓悃臆

代上本州知州啟

自塵仕級即稔賢聲萬里宦遊方貳脩候之屏一廛農
畝獲依刺史之天論幸固多貢音為慮伏惟坐班寬詔
誕擁龐褫恭以某官經世偉才措紳碩望禁塗翔步計
在于匪朝郡閣觀風寧需于滿歲伏望益綏寢味以迓
寵休

代上到任謝監司啟

過承優詔獲典重藩初見吏民自慙師帥茲有公麻之

託得無私幸之多伏念某一冒榮階久糜稍食崎嶇官路之險少所備嘗黽勉公家之為老而逾勵嚮按章于遐服旋佐幕于中幾專領一司甫彌周歲罔裨尹治僅脫官瘼誤奉朝恩俾分州寄矧孟門之劇鎮乃禹貢之粵區風宜信佳氣俗殊悍桑土之資既富萑苻之萃亦繁過家之上先塋實為便道守邨之驚兩組殆是故鄉撫柔其間踈短為懼茲蓋伏遇某官器函閩博才貫幾深上簡淵衷外臨要部澄清一道舒慘百城特霽使臺

之嚴顏與之假借有容卿寺之朽質得所據依敢不祇服攸箴勉圖所報推行新法之本意以便吾民宣布本朝之寬條俾知上德下情感賴曷究名言

代上參政趙侍郎啓

撫闕輔之一方殆周歲籥遠京師之千里增跂台光日有教條之奉行坐成書禮之稀濶伏惟參聞國論翕受天和恭以某官學際聖賢量包公輔至誠以矯物僞重德以鎮世浮自先帝之知人洎上方之圖舊十載台路

一心王家致主暢謀益秘省中之語貳公論道弗收天下之名行徽冊之延登慶洪鈞之付畀

代上樞密侍郎啓

向以短才猥當重寄撫綏何術可臨西土之民兵疾苦所詢或見故鄉之父老中心爰究累月于茲曠尺牘之問安積寸襟之馳仰伏惟神機所總時祉載蕃恭以某官業履崇高智謀光大經正德以儀庶位挾重計以尊本朝嚮冠序于宰廷久宣勞于王室蒐濶儀之未講範

成憲於可行乃收真相之極功以畢大臣之能事付鴻樞
之要柄來英袞之昔謨文武以兼安危所繫矧廟堂之
畫一尚循蕭相舊規惟懼運竒更藉留侯之前箸聊制
五兵之本復調萬物之鈞

回上制置發運待制啓

蚤以頑蒙謬塵獎拔發蹤門下致諸公之交章去德歲
餘無一日而忘惠向他邦之待次方小邑之效官訟謀
相紛日嗟州縣之勞職公函缺謀懼浼朝廷之違尊伏

惟大計坐籌繁禧來集恭以制置發運待制鍾氣間傑
為時老成董轉給于外臺久繫碩畫步凝嚴于內閣獨
映榮班主知益明賢業彌劬紅粟朽貫已增羨于邦儲
英袞繡裳行進圖于廟畧俛惟疎賤訖託延鎔

代回答亳州朱侍讀啓

自塵劇使曾靡定居間走浙孺亟來淮服董漕臺之將
給精爽幾殫企鈴閣之邃嚴晤言都隔豈謂乘偃藩之
多暇飭記室以占音祇服眷存第勤銘刻恭以某官名

重天下道簡上心屏翰一邦聊寄中和之治挺鎔萬品
行摠康濟之才益保興居庶符瞻頌

代答度主簿啓

某寡能近跪承乏劇封顧使擢之已行不敢輒讓恃賢
僚之餘裕可容匪才豈謂祕書先被郡符暫煩獄寄方
違始望遽辱好音感慰并懷名言非諭

代與王內翰啟

被詔西來彘假金城之守引領東望日企玉堂之賢缺

貢書音仰咨德履想嚴塗之眦草擁寵福以如茨恭惟
某官學入眵微道先民覺文章取重于榮路詔命推高
於禁林導宣睿心明如星斗之揭鼓動羣聽震若雷霆
之馳聲名素格於上聰潤色久煩於大手行自複門之
要徑躋二府之崇賢業得申朝言方允

代上太保啓

伏以某官術業該深才猷膚敏親逢盛際獨映榮班游
更使領之崇自結宸嚴之眷將明恩于郡國方諭上仁

書茂績于鼎彝行攄將畧

又

伏審遠泛仙艫甫臨陋壤行瞻使範增忤愚襟恭以某
官莊亮秉心忠純迪操羽儀環衛蚤踐于班榮陟降禁
嚴特優于主眷瞻風伊邇獲幸良多

代上集賢相公啓

往違翹館來刺劇州省才畧之短踈愧恩榮之優重坐
勤官事罔知日月之遷仰庇台光曾缺寒暄之問伏惟

密謨王體參嚮天祺恭以某官涵德淳深秉彛惇大得
位行道擴經濟之初心尊主庇民奄太平之偉績彌縫
袞職之闕調適鼎司之和崇謙矩以自持避豐功而弗
有堯舜相授方逢極治之期邴魏有聲永底協恭之績

問侯上青州文相公啓

伏審茂對詔音出班藩政埏鎔有舊歡抃增深恭以某
官社稷宗臣山河間氣秉直道以結人主扶重計以尊
朝廷鼎宅鼎司首調國絳裁黜貴倖振拔滯淹窒塞濫

源啓闢治路底邦猷於甚盛密簡中宸避廟略而弗居
懇辭上袞剖守符而均佚露公冕以觀風卷康濟之大
而就一州遂藩宣之樂而鬱四海朝端劇位累復於登
庸京左數邦更繫於鎮撫一相處外勞周伯之未歸萬
民具瞻願晉公之再入行膺徽冊還陟元台

又

伏審茂對明緡改臨重鎮肅使旌而就道露公冕以觀
風休命傳聞列藩竦抃恭以某官器函簡厚道備將明

儲精上天佐命皇國富貴由道宜位冠于中階君臣同心俾世登于至治暢袞謀於已試隱廟畧而弗居出甸陪京靡容滿歲副天子詔書之意思慰遐氓分大臣方面之權就更巨屏行聞鎮撫雅俗布宣寬條五月政成趣晉公之再入三篇冊拜復周尹之具瞻

代上呂舍人啓

羸者伏值知府舍人被命于藩擁麾過泗輒緣幸會獲拜台儀自爾吏職相乘日有泥塗之辱公亟不講懼干

爵德之尊洎解賤官復沾巨惠無舉家投足之地方困
他邦給異日濟川之舟俾還素里沐恩至渥論敢寧殫
恭惟知府舍人道備將明器函簡厚高文取重於時論
大筆追還於古風陟降嚴塗蚤揚于仙貫發揮外命適
暢于辰猷固宜徑登政府之崇增重本朝之列眷言右
溯之會樂駕兩轡之游觀風澤民尚屈一州之用得位
行道未平四海之瞻佇對宸緡亟陞台席

代興永康仙尉祕校啓

瑣焉近器效此冗官幸陋邑之密藏分清流之勝境豈
圖高議首枉珍函獎與過優銘藏增劇恭惟某官天資
夷爽士檢淳明較藝省闈數當高選試才縣道尚抑修
程行對華章勉綏素履

回泛與諸官啓

自解守符逖疎賢檢邈爾道途之阻徒然燕語之傾契
濶以還起居何若官能肅給行對於寵褒時序歆炎勉
加於遵衛企頌之切敷述奚殫

代與錢塘知縣張殿丞啓

一辭鄉邦三仕京府參差歸計汨沒塵容邈然先疇適
在治部聞滕公之仁政庶得相依因馬鄉之宦游未緣
親炙伏惟字民有裕膺福無疆恭以知縣殿丞業履純
明氣質高爽治有餘地誠百里之淹才誦已載塗喜萬
家之蒙福行躋華貫適躔清門伏望善順節宣精調燕
餽

代與襄州劉待制啓

遠據歸鞍適經便道氓謠溢耳甫及仁侯之封賓舄馳
心行瞻延閣之範屬歲筒之道盡惟福履之綏和峴首
班春尚淹柄任堯心圖舊即被召還企嚮燕深指云莫罄

代答上荆南府知府啓

自違節下尋吏淮邊念簿領之裝懷曾無暇日願音騰
之致問不覺曠時溽暑貫辰粹襟迪吉恭以某官名重
朝論才為吏師自結上心之知暫受方面之寄荆渚江
山之勝聊助清吟槐庭位著之嚴行膺寵拜

代上張成殿丞啓

入奉宸緡出紆守紱方休道路之勤頓卽有詔條之奉
行馳謝未遑賜音俄及仰銜雅好陰激懦衷恭以某官
夷靖自居直清不倚朝闈著籍茲漸于榮階利局沈才
行祇於休命

回上省副兵部啓

恭惟省副兵部才兼數器名重本朝屈貳財闈甫足中
都之費進登法從行爲近署之光陽德方升天和參嚮

永言瞻頌曷盡文陳

代上發運兵部啓

右某啓某胄系單微天資鄙固懼無名於沒世因有意於興宗力究聖賢之書弗泐父祖之業人皆謂其狂妄天獨啓於愚冥兩與計偕一塵舉首方激昂於壯節遽困墜於下科母未嘗於君羹子已泣於封樹念徧親之需養延餘息以圖生勉就銓除之官准服矧在掾曹之賤獨稱獄吏之難蓋上官之議有重輕而細民之罪係

出入苟持平之一失則置法於必傾以故攷求物情執
守公是然孤音寡和動畏於謗譏而方枘投圓間逢於
嫌怒第慙廉而自信且朴訥之誰憐如散木之出溝中
匠無顧者若棄芻之委道上人皆踐之伏遇制置發運
兵部振起時風陶成士類忘其位號之隔視若子姓之
親許力倡於諸公將首形於清舉齒牙過獎羽翼隨生
昔者魯經尊仲尼之褒有如贈袞楚諺珍季布之諾不
啻得金而况通漕劇權薦紳碩望一言所與羣議為榮

決期孤跡之成弗自他門而致當繇恩館以漸亨塗重
念某粗免官瘵甫周考格僮受代而去不備於使令則
蒙遇雖優何緣而振拔是猶茂林弗能庇欲墜之葉巨
浸不足活已枯之鱗伏望制置發運兵部垂惻滯蹤助
開公道特加慰薦訖保孱庸如此則孤抱如丹誓圖於
補報羣才知勸率屬於廉隅捨是以還未知所指

祠部集卷二十三